

# Të huajt dhe azilkërkuesit në Shqipëri

**Tiranë, më 24 Janar 2018:** Numri i të huajve me leje qëndrimi në Shqipëri, në 2016, rezultoi 12.519, duke shënuar një rritje me 18,5 %, krahasuar me 2015. Gjatë 2016, numri i të huajve rezident përbëhet nga 8.324 meshkuj dhe 4.195 femra. Grupmosha 30 - 59 vjeç zë 62,4 % të të huajve gjithsej në 2016, duke shënuar një rritje me 25,8 %, krahasuar me të njëjtën grupmoshë në 2015.

Në vitin 2016, të huajt me origjinë nga Europa janë 8.324 dhe përbëjnë 66,5 % të të huajve gjithsej.

Të huajt për arsye punësimi, në vitin 2016, janë 6.263, dhe përbëjnë 50 % të të huajve gjithsej në vend.


Të huajt e parregullt, të evidentuar në 2016, rezultojnë 915 persona, duke pësuar një rënie me 55,3 %, krahasuar me vitin 2015.

Azilkërkuesit në Shqipëri, në 2016, rezultojnë 240 persona, duke shënuar një rritje me 126 %, krahasuar me vitin 2015.

## Të huajt në Shqipëri

Numri i të huajve me leje qëndrimi në Shqipëri, në vitin 2016, përbën rreth 0,4 % të popullsisë rezidente. Gjatë 2016, numri i të huajve rezident përbëhet nga 8.324 meshkuj dhe 4.195 femra. Meshkujt zënë rreth 66 % në numrin e të huajve me leje qëndrimi në Shqipëri.

**Fig. 1 Të huajt me leje qëndrimi sipas gjinisë, 2005 – 2016**



Burimi: Departamenti për Kufirin dhe Migracionin

**Për publikim 24/01/2018**

**Tab. 1 Aplikimet për leje qëndrimi në Shqipëri, 2015 – 2016**


Nr.	Shteti	2015	2016
1	Itali	1.584	1.694
2	Turqi	1.199	1.032
3	Kosove	806	730
4	Greqi	250	229
5	SHBA	206	221
6	Kanada	131	107
7	Kine	174	215
8	Maqedoni	180	177
9	Gjermani	100	136
10	Mbretëri e Bashkuar	129	118
11	<b>Gjithsej</b>	<b>4.759</b>	<b>4.659</b>

Burimi: Departamenti për Kufirin dhe Migracionin

**Të huajt në Shqipëri sipas kontinenteve**

Të huajt sipas vendit të origjinës në 2016, kryesohen nga vendet e Europës, të cilët zënë 66,5 % të të huajve gjithsej. Të huajt me origjinë nga Europa janë 8.324, duke shënuar një rritje me 10,1 %, krahasuar me 2015. Të huajt me origjinë nga Azia janë 3.244, duke shënuar një rritje me 89,6 %, krahasuar me 2015. Të huajt me origjinë nga Afrika, Amerika dhe Oqeania janë 951, duke pësuar një rënie me 26,2 %, krahasuar me 2015.

**Fig. 2 Të huajt me leje qëndrimi sipas vendit të origjinës, 2005 – 2016**



Burimi: Departamenti për Kufirin dhe Migracionin

### Të huajt në Shqipëri sipas arsyes

Në vitin 2016, sipas arsyes, të huajt që aplikojnë për leje qëndrimi për punësim zënë 50,0 % të të huajve gjithsej, ndjekur nga aplikimet për bashkim familjar me 22,2 %, aplikimet për qëllime humanitare me 19,1 %, aplikimet për studime me 5,2 % dhe aplikime për arsye të tjera me 3,4 %.

**Tab. 2 Të huajt me leje qëndrimi sipas arsyes së aplikimit, 2005 – 2016**

Motivi i qëndrimit	Punësim	Bashkim Familjar	Studim	Humanitar	Të tjera
2009	5963	622	90	35	83
2010	4148	977	183	42	313
2011	4450	1497	265	44	359
2012	4565	1867	515	47	359
2013	5302	1765	775	229	259
2014	5353	2266	752	441	279
2015	5862	2573	842	863	423
2016	6263	2783	652	2395	426

Burimi: Departamenti për Kufirin dhe Migracionin

### Të huajt e parregullt

Të huajt, të cilët kapen në territorin e Shqipërisë pa dokumentacionin e nevojshëm ose gjatë kalimit të kufirit nëpërmjet vijës tokësore, rezultojnë gjithsej 915 persona në 2016, duke pësuar një rënie me 55,3 %, krahasuar me vitin 2015.

Shumica e të huajve të parregullt, mbi 70 % e tyre, janë evidentuar në zonat kufitare, ndërsa pjesa tjetër në territor.


### Azilkërkuesit në Shqipëri

Azilkërkuesit në Shqipëri, referuar Drejtorisë së Azilit pranë Ministrisë së Punëve të Brendshme, rezultojnë 240 persona në 2016, shifër kjo e cila ka pësuar rritje me 126 %, krahasuar me 2015.

Duke analizuar vendin e origjinës së azilkërkuesve, në Shqipëri kuptojmë se shumicën e rasteve e përbëjnë ato me origjinë nga Siria, rreth 130 azilkërkues dhe ato me origjinë nga Afganistani, rreth 60 azilkërkues për 2016.

Në 2016, vihet re një rritje e numrit të azilkërkuesve nga Afganistani dhe Iraku.

Fig. 3 Azilkërkuesit sipas vendit të origjinës, 2014 – 2016



Burimi: Drejtoria për Azilin, Ministria e Punëve të Brendshme

### Azilkërkuesit sipas gjinisë

Numri i azilkërkuesve meshkuj në 2016 është 186, duke shënuar një rritje me 126,8 %, krahasuar me vitin 2015. Numri i azilkërkuesve femra në 2016 është 54, duke shënuar një rritje me 125,0 %, krahasuar me vitin 2015.

Vihet re një dominim i meshkujve në numrin e azilkërkuesve në Shqipëri gjatë viteve 2014 – 2016, ku meshkujt zënë 77,5 % të numrit gjithsej të azilkërkuesve në 2016.

### Marrja dhe lënia e shtetësisë Shqiptare

Në 2016, rezultojnë 281 persona të cilët kanë fituar shtetësi shqiptare, duke pësuar rritje me 9,3 %, krahasuar me vitin 2015.

# Metodologjia

## Definicione

**I huaj** – Është çdo person, me ose pa shtetësi, i cili, sipas legjislacionit shqiptar, nuk është shtetas shqiptar.

**Leje qëndrimi** – është dokumenti i lëshuar nga autoritetet kompetente, i cili autorizon dhe lejon të huajin të qëndrojë në Republikën e Shqipërisë më shumë se 90 ditë brenda 180 ditëve.

**Person pa shtetësi** – është personi, i cili nuk ka shtetësinë e asnjë shteti.

**Leje pune** – është autorizimi i lëshuar nga autoriteti shtetëror përgjegjës një të huaji, për qëllime biznesi, për t'u punësuar, vetëpunësuar ose për formim profesional.

**Bashkim familjar** – është hyrja dhe qëndrimi në Republikën e Shqipërisë të anëtarëve të familjes së një shtetasi shqiptar, të cilët nuk kanë shtetësinë shqiptare, ose të huajit, ose refugjatit, banor në Republikën e Shqipërisë, me synim ruajtjen e familjes, pavarësisht nëse marrëdhënia familjare krijohet para apo pas hyrjes së të huajit në Republikën e Shqipërisë, në rastet e bashkimit familjar të familjes së të huajit.

Anëtarë të familjes së të huajit, azilkërkuesit, refugjatit apo personit nën mbrojtje plotësuese – janë bashkëshorti/bashkëshortja, bashkëjetuesit/bashkëjetuesi, bashkëjetesa e të cilit ka një karakter të qëndrueshëm dhe të provuar; të miturit, fëmijët e pamartuar, pjesë e përbërjes familjare, përfshirë dhe ata të vendosur në regjim të kujdestarisë dhe që janë në ngarkim të tij ose të saj apo të birësuar me vendim gjykatë apo një vendimi që zbatohet drejtpërdrejt, sipas detyrimeve ndërkombëtare të Republikës së Shqipërisë ose që duhet të njihet, në përputhje me detyrimet ndërkombëtare, si dhe fëmijët e rritur, të pamartuar, kur ata nuk mundin objektivist të plotësojnë nevojat e tyre, për shkak të gjendjes së tyre shëndetësore; paraardhësit e shkallës së parë në linjë të drejtë, kur janë në ngarkim të tij, ose bashkëshortes/bashkëshortit, sipas legjislacionit të origjinës dhe nuk gëzojnë mbështetjen e duhur familjare në vendin e origjinës.

**Shërbimi vullnetar** – është një program aktivitetesh solidarizuese, bazuar në veprimtari të njohura në Republikën e Shqipërisë, në zbatim të objektivave të interesit të përgjithshëm.

**Studiues dhe specialist** – janë të huajt që kanë njohuri të specializuara, thelbësore, për shërbimin, pajisjet kërkimore dhe nivel të lartë kualifikimi për aktivitetin që ushtron ndërmarrja ose institucioni kërkimor.

**Qëndrim i parregullt** – është prania në territorin e Republikës së Shqipërisë të një të huaji, i cili nuk plotëson, ose nuk plotëson më kushtet për hyrje, qëndrim ose banim në territorin e Republikës së Shqipërisë.

**Shtetësia shqiptare** – fitohet, rifitohet, humbet apo lihet në përputhje me dispozitat e ligjit, i cili respekton normat e parimet e njohura të së drejtës ndërkombëtare në fushën e shtetësisë të pranuar nga Republika e Shqipërisë.

**Marrja e shtetësisë** – një i huaj që ka paraqitur kërkesë për marrjen e shtetësisë shqiptare, e fiton atë në rast se plotëson kushtet e paracaktuara në ligj.

**Azil** – është forma e mbrojtjes ndërkombëtare që Republika e Shqipërisë u jep refugjatëve.

**Kërkesë për azil** – është çdo deklaratë e të huajit ose personit pa shtetësi, e shprehur në çfarëdolloj mënyre e në çfarëdo kohe përpara autoriteteve kompetente në pikat e kalimit kufitar apo brenda territorit të Republikës së Shqipërisë, i cili kërkon mbrojtje ndërkombëtare, sipas konventave ndërkombëtare dhe legjisllacionit shqiptar.

**Aplikim për azil** – është kërkesa zyrtare e të huajit ose personit pa shtetësi para autoritetit përgjegjës për azilin dhe refugjatët, e cila vlerësohet si një kërkesë për mbrojtje ndërkombëtare, sipas Konventës së Gjenevës së OKB-së, "Mbi statusin e refugjatit". Çdo kërkesë për mbrojtje ndërkombëtare vlerësohet si aplikim për azil, përveç rastit kur i huaji kërkon qartazi një lloj tjetër mbrojtjeje, për të cilën aplikohet veçmas.

**Azilkërkues** – është çdo i huaj apo person pa shtetësi, që shpreh në çfarëdolloj mënyre se nuk dëshiron të kthehet në vendin e tij, si dhe çdo i huaj apo person pa shtetësi që ka paraqitur një aplikim për azil në Republikën e Shqipërisë, për të cilin nuk është marrë ende një vendim përfundimtar.

**Shtet apo vend i origjinës** – është shteti, shtetësinë e të cilit mban azilkërkuesi apo refugjati dhe, në rastin e personave pa shtetësi, shteti në të cilin refugjati apo azilkërkuesi ka vendbanimin e tij të zakonshëm.

### **Burimi i të dhënave**

Të dhëna mbi të huajt me leje qëndrimi në Shqipëri sigurohen nga Drejtoria e Përgjithshme e Kufirit dhe Migracionit;

Të dhënat mbi Azil Kërkuesit në Shqipëri sigurohen nga Drejtoria mbi Azilin në Ministrinë e Punëve të Brendshme;

Të dhëna mbi marrjen dhe lënien e shtetësisë sigurohen nga Drejtoria Juridike në Ministrinë e Punëve të Brendshme.